

## KASAULOGAN

### **Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ewanghelisasyon**

**Dugukan:** Ang Simbahan sa Kabus, pinaagi sa Gagmayng Simbahanong Katilingban, nga giamoma sa Lawas ug Dugo ni Jesus, makapuyo sa iyang identidad isip Lawas ni Kristo kon, sama kang Jesus, iyang tugutan nga ang iyang lawas malugti ug ang iyang dugo iula isip kalan-on ug ilimnon sa katawhan!

#### **Katesismo:**

At karong saulogon ang piyesta sa Mahal nga Lawas ug Dugo ni Jesus, nga giila nga Corpus Christi. Mahinuklogon kaayo kining pyestaha alang kanato. Sa atong pag-apil sa kinabuhi ug gugma sa Santisima Trinidad dinhi sa kalibutan, gipakaon kita ug gilig-on sa atong langitnong pagkaon: ang Lawas ug Dugo ni Kristo! Sa atong pagsaulog karon, ug sa paghimo sa Lawas ug Dugo ni Kristo nga atong kalan-on sa mata'g adlaw, ato usab ipadayon ang pagpamalandong sa misyon ni Jesus. Matud pa sa PKP-II:

#### **“7. Aron Pagpalingkawas gikan sa Kasal-anan**

(53) Samtang ang mga Apostoles mosunod sa gugma ni Jesus alang sa mga kabus, ila usab nga buhaton ang misyon sa pagpalingkawas sa katatwhan gikan sa kasal-anan. Kay misulod si Jesus sa kalibotang makasasala aron pagkonbikto niini sa sala. Iyang gipalingkawas ang mga katawhan gikan sa kaulipnan sa kahakog, sa pagrelatibisa sa mga idolong kwarta ug gahum, ug siya mi-insistir nga ang Diyos lamang ang angay simbahan ug alagaran. Matud pa niya, angayang higugmaon nato Diyos sa bug-os natong kasingkasing, kalag, hunahuna ug kusog, ug ato usab angayang higugmaon ang atong silingan sama sa atong kaugalingon. Iyang gitawag nga buang ang datong tawo kansang mga hunahuna para lang sa iyang kaugalingon ug sa iyang mga kabtangan. ‘Unsa may ginansya,’ nangutana siya, ‘sa usa ka tawong nakapanag-iya sa tibook kalibutan apan nawad-an man hinoon sa kinabuhi?’ Iyang gipalingkawas ang katawhan pinaagi sa pagpasaylo sa ilang mga sala, pinaagi sa eksorsismo, pinaagi sa iyang gahum nga makaayo. Niini iyang gipakita nga ‘ang kalingkawasan ug kaluwasan nga gidala sa Gingharian sa Dios moabot ra sa tawo sa iyang pisikal ug epiritual nga mga dimensyon.

(54) Gipagawas ni Jesus ang katawhan gikan sa ilang kahadlok ug kahigwaos pinaagi sa paghatag kanila'g kasigurohan sa kalooy ug sa prohibensya sa Ginoo. Gipagawas sila gikan sa maulipnong pagtahud sa mga institusyon. Apan wala lang si Jesus mosulti ug mobuhat batok sa kangil-ad. Nag-ampo siya. Iyang gidala ang iyang mga buluhaton atubangan sa Amahan pinaagi sa pag-ampo aron mahatagan siya'g kusog sa iyang pagpakigbugno batok sa kadautan. Ug unsa man gani ang iyang gibuhay, iya usab gitudlo ngadto sa iyang mga disipulo. Adunay kadautan, matud pa niya, nga malabay lamang pinaagi sa pag-ampo. Ug gitudloan niya sila sap ag-ampo, ‘Luwasa kami sa kadautan.’”

(46) Gihulma niya silang usa ka pundok, ang pinakalawom nga sirkulo iyang gitawag: ang Napulog Duha. Ngadto kanila iyang gipadayag ang mga misterio sa Gingharian sa Diyos. Gitudlo niya kanila nga ang tinagoan bahin sa pagkabanggiitan sulod sa Gingharian anaa man sa daw-

binatang pagsalig sa Diyos ug sa mapahiubsanong pag-alagad. Gipadala niya sila alang sa sa usa ka tahas ngadto sa mga kabaryhohan ug kalungsuran sa Israel.

Isip GSK, pamalandongi ang mga timailhan sa “kalibutang makasasala” palibot ninyo nga kinahanglang imong hukman nga sala. Unas may mga timailhan sa inyong “pagkaulipon sa kahakog” (salang personal) ug sa inyong pag-diyos-diyos sa salapi ug gahum (salang katilingbanon)? Sa laing bahin, unsa man ang nagkalahing timailhan nga kamo nagpakita ug pagtahud, pag-ampo ug pag-alagad sa usa lamang ka Diyos, ug sa wala nay lain? Gawasnon ba gayud kamo tungod kay gipalingkawas kamo gikan sa “maulip-nong pagtahud sa mga institusyon”? Gilig-on na ba kamo batok sa dautan pinaagi sa pag-ampo, sa pag-ampong nagkanayon: “Luwasa kami sa dautan”?

---

## **Hunyo 22, 2014: Pangilin sa Mahal nga Lawas ug Dugo ni Jesus (Corpus Christi)**

### **Rito sa Pagsugod**

P: Sa ngalan sa Amahan ug sa Anak ug sa Espiritu Santo.

*K: Amen.*

P: Ang grasya sa atong Ginoong Jesukristo, ang gugma sa Diyos ug ang panaghiusa sa Espiritu Santo maanaa kaninyo.

*K: Maanaa usab kanimo.*

### **Pag-abli ug Pag-abi-abi**

Mga minahal kong mga igsoon: ipadayon nato ang pagsaulog sa atong kinabuhi nga malipayon ug mapasalamaton isip Simbahan, isip katilingban sa katawhan sa Diyos. Ato karong iampo nga espesyal ang grasya nga mas moinit pa gayud unta ang atong pagdawat sa Lawas ug Dugo ni Kristo isip atong pagkaon ug tinubdan sa kusog sa inadlaw-adlaw tang pagpakigbisog alang sa mas maanindot nga kalibutan, samtang nagapaabot kit asa kahingpitan sa Gingharian.

### **Akto sa Paghinulsol**

P: Mga igsoon, ato pangayoon karon sa Diyos ang iyang pasaylo sa atong mga sala, aron mahimo kitang takus sa pagsaulog niining mga balaang misteryo.

P: Nagakumpisal ako...

*K: Sa Diyos makagagahum sa tanan .... Nga inyo unta akong iampo sa Ginoo nga atong Diyos. Amen.*

P: Kaloy-an unta kita sa Dios...ngadto sa kinabuhing walay katapusan.

*K: Amen.*

P: Ginoo, kaloy-i kami.

*K: Ginoo, kaloy-i kami.*

P: Kristo, kaloy-i kami.

*K: Kristo, kaloy-i kami.*

P: Ginoo, kaloy-i kami.

*K: Ginoo, kaloy-i kami.*

### **Himaya sa Diyos didto sa langit...**

---

#### **Kolekta**

P: Mag-ampo kita: O Diyos, kinsa niining katingalahang misteryo nagbilin nganhi kanamo ug panumduman sa imong pagpakasakit, itugot, naga-ampo kami, nga amo untang pagatahuron kining santos nga mga misteryo sa imong Lawas ug Dugo aron among masinati dinhi kanamo ang mga bunga sa imong pagpanubos, kinsa buhi ug hari uban sa Amahan diha sa kahiusahan sa Espiritu Santo, Dios nga usa, hangtud sa kahangturan.

*K: Amen.*

---

#### **Liturhiya sa Pulong**

##### **Unang Pagbasa: Deut 8:2-3,14b-16a**

L: Ang Pagbasa gikan sa Basahon sa Deuteronomiyo.

(Basahon gikan sa Kasulatan)

L: Ang Pulong sa Ginoo.

*T: Salamat sa Dios.*

##### **Komentaryo sa Deut 8:2-3,14b-16a**

Ang kamingawan usa ka tinuod nga lugar sa pagsulay ug usab símbolo sa pag-ugmad sa kagawasan ug konsiyensya sa tawo. Sa kamingawan, kinahanglang magpili ang tawo tali sa gutom ug kamatayon, katiunay sa Ginoo o idolatriya, maayo o dautan. Diha sa kasinatian sa kamingawan mopili ang tawo tal isa kagawasan, isip batakang paghukom-moral tali sa mayo ug sa dautan, ug dili lamang sa pagpili ug usa ka butang tali sa daghan. Diha usab sa kasingkasing, sa konsiyensya, mahikaplagan sa tawo ang tinuod nga pagkaon sa kinabuhi: sa pagpatalinghug ug pagtuman sa tingog sa Diyos. Apan kining pinaka-katapusang pagpili sa mana, ang pagkaong langitnon, wala magsalikway sa mga natampo sa siyensya alang sa paghulma sa kinatibuk-ang pagkatawo, uban sa iyang kahiladman, sa iyang konsiyensya. Kay sa pagkatinuod, ang mga balaod sa kinaiyahan, ug ang pagkaplag kanila isip siyensya, maoy may tinuod nga mga yawe sa mas halawom nga pagasabot sa pulong nga gikan sa baba sa Diyos.

---

**Salmo Responsoryo: Sal 147:12-13, 14-15, 19-20**

(Basahon gikan sa Kasulatan)

---

**Komentaryo sa Sal 147**

Awit kini sa pasalamat ug pagdayeg. Sa ikaduhang bahin sa salmo, giawhag ang syudad sa Jerusalen sa pagdayeg sa Ginoo tungod sa iyang nahimo. Iyang gihatagan ug kasigurohan ang dakbayan, gipanalanginan ang mga lumulupyo niini uban sa mga kabataan ug pasalig sa umaabot nga mga kaliwatan; iyang gipanalipdan sila pinaagi sa iyang kalinaw, busa sila malamboon. Tungod kay gimahal sila sa Diyos ug sila iyang mga paborito!

---

**Ikaduhang Pagbasa: 1 Kor 10:16-17**

L: Ang Pagbasa Gikan sa Unang Sulat ni San Pablo sa mga taga-Korinto.

(Basahon gikan sa Kasulatan).

L: Ang Pulong sa Ginoo.

*T: Salamat sa Dios.*

---

**Komentaryo sa 1 Kor 10:16-17**

Gipasidan-an ni Pablo ang Kristohanong katilingban sa Korinto sa mga kakuyaw sa idolatriya, pinasikad sa mga nahaunang mga kasinatian sa Israel nga karon gawasong gihubad ni Pablo ubos sa siga sa panghitabo ni Kristo. Ang tanang kalapasan sa kaniadto, nga nagpakita sa posibilidad sa pag-ampo nga idolatriya, nagtultol ngadto sa mga leksyon nga nag-andam sa kasamtangang kaliwatan sa pagsimba sa tinuod nga Diyos diha ni Kristo Jesus. Ang pag-inum gikan sa kalis mao ang pag-apil sa paghatag ni Kristo sa iyang kaugalingon; ang pagkaon sa pan mao ang pag-apil sa kahiusahan ug komunyon sa katilingban nga mao ang Lawas ni Kristo. Ang Eukaristiya kasaulogan sa konkretong walay pagtagad sa kaugalingon aron maalagaran ang katawhan ug mao usab kini ang pag-bag-ong katilingban natong tanan nga adunay patas nga dignidad ug adunay solidaridad sa mata'g nagkalainlaing bahin sa usa ka lawas. Ang pagsimba nga idolatriya ug yawan-on nga angay isalikway mao ang pagsimba sa mga nagkahiusang gahum nga nagmando pinaagi sa inhustisya ug pagdaugdaog, nga nagsanta sa katawhan nga mahimong katilingban sa gugma ug pag-alagad.

---

**Berso sa Alleluya**

**T: Aleluya, aleuya.** Ako mao ang buhing tinapay nga mikanaog gikan sa langit, nag-ingon ang Ginoo; kinsa gani kadtong mokaon niining tinapay mabuhi hangtud sa kahangtoran! **T: Aleluya, aleluya.**

---

**Ebanghelyo: Juan 6:51-58**

P: Ang Ginoo maanaa kaninyo.

K: *Maanaa usab kanim.*

P: Ang Santos nga Ebanghelyo Sumala ni San Juan.

(Basahon gikan sa Kasulatan)

K: *Himayaon ikaw, O Ginoo.*

---

P: Ang Ebanghelyo sa Ginoo.

K: Dayegon ikaw, O Kristo.

---

**Komentaryo sa Juan 6:51-58**

Gi-aplikar ni Jesus ang kasinatian sa Israel bahin sa mana sa disyerto sa iyang kaugalingon. Niining tungora, siya mismo ang pagkaon ug ilimnon, sa iyang lawas ug dugo, sa iyang konkretong pagkatawo ug sa iyang pamaagi sa pagpakabuhi, isip Diyos nga nagpakaon sa iyang katawhan karon ug hangtud sa umaabot nga kinabuhing walay katapusan. Ang iyang pagka-tinuod nga pagkaon alang sa kinabuhing dayon kanunay nahilambigit sa Krus diin siya namatay ngadto sa sala sa in hustisya nga wala niya mabuhat; diin siya gibayaw ug gihimaya isip mananaog batok sa sala ug kamatayon.

---

**Wali: Ang Simbahan sa Kabus, pinaagi sa Gagmayng Simbahanong Katilingban, nga giamoma sa Lawas ug Dugo ni Jesus, makapuyo sa iyang identidad isip Lawas ni Kristo kon, sama kang Jesus, iyang tugutan nga ang iyang lawas malugti ug ang iyang dugo iula isip kalan-on ug ilimnon sa katawhan!**

<b>Sumada sa mga Mensahe sa Dominggo:</b>	<b>Konkretong kahimtang sa mga Kabus:</b>	<b>Pamalandong/Hagit/Tawag:</b>
Ang Simbahan sa Kabus, pinaagi sa Gagmayng Simbahanong Katilingban, nga giamoma sa Lawas ug Dugo ni Jesus, makapuyo sa iyang identidad isip	Sa inyong kasinatian isip GSK ug sa inyong katilingban, unsa man ang mga konkretong babag nga nagsanta kaninyo sa pagpuyo sa Kristohanong kagawasan ug sa kahalangdon	Ang Eukaristiya mao ang pungkayng ekspresyon sa atong mahigugmaong pakighiusa sa Diyos, sa tagsa-tagsa ug sa kinaiyahan. Mao usab kini ang

Lawas ni Kristo kon, sama kang Jesus, iyang tugutan nga ang iyang lawas malugti ug ang iyang dugo iula isip kalan-on ug ilimnon sa katawhan!	isip tawo? Ipatumaw ang mga pipila ka mga panig-ingnan diin ang nagharing hut-ong mao ang naghukom sa inyong mga pagpili ug naghiwi sa pag-ugmad sa inyong konsiyensya.	pinakabanggiitang tinubdan sa kusog ug inspirasyon nga makapaduol kanato kang Jesus, sa iyang Krus ug sa iyang tinguha!
--	---	---

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasalyo sa mga sala, sa pagkabanhaw sa lawas, ug sa kinabuhing walay katapusan. Amen.

---

### **Katilingbanong Pag-ampo**

P: Mga hinigugma kong mga igsoon, malipayon ug mapahiubsanon kitang mohangyo sa Amahan sa mga grasya nga atong gikinahanglan aron puy-an nato ang atong identidad isip Lawas ni Kristo, andam ug buot lugtion ug duslakon aron kita mahimong kinabuhi ug pagkaon sa uban. Sa mata'g pag-ampo, kita motubag: Ginoo, pakan-a kami kanunay sa Lawas ug Dugo sa imong Anak.

***T: Ginoo, pakan-a kami kanunay sa Lawas ug Dugo sa imong Anak.***

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagtabang sa pagpalingkawas sa katawhan gikan sa pagka-ulipon sa kahakog, sa idolatriya sa salapi ug gahum, ug mo-insistir nga ang Diyos lamang ang simbahan ug alagaran ug ang silingan higugmaon sama sa kaugalingon. Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ila untang ipadayon ang pagtukod ug mga estruktura sa pag-amoma nga makatabang sa pagpalingkawas sa katawhan gikan sa kahadlok ug kahingawa, ug gikan sa “maulipnong pagtahod sa mga institusyon”, aron sila mahimong mas malipayon, mas mamugnaon ug mas mapangahason sa pagsaksi sa imong kalooy ug probidensya. Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang paluyohan ug barugan ang mga programang pang-edukasyon ug pagbansay sa kahanas nga makatabang sa pagpalingkawas sa mga kabataan ug mga

kabatan-onan gikan sa kadawo, nga moapil sila sa mga kalihukang boluntarismo ug katilingbanong radikal nga pagbag-o ug tinuod nga katilingbanong kausaban. Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

L: Alang kanatong tanan, mga lumulupyo sa kalibutan ug sakop sa kalangitan: nga magtinabangay unta kita nga maamgohan ang atong mga sala tungod sa atong personal nga mga buhat sa kahakog ug tungod usab sa impluwensya ug tuklod sa mga katilingbanong estruktura nga gilimin sa kulturang sa korupsiyon, sa kabakakon ug pagpahimulos ug nga hinonoa, madasig unta kita sa pag-usab kanila sa diwa sa Bag-ong Ewanghelisasyon. Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

L: Alang sa atong mga espesyal nga mga tinguha, sa kahilom sa atong tagsa-tagsa ka kasingkasing, (mohilum kadiyot) .... Mag-ampo kita sa Ginoo.

***T: Ginoo, pakan-a kami kanunay sa Lawas ug Dugo sa imong Anak.***

P: Ginoo, mao kini ang mga pag-ampo nga among gihalad kanimo karon. Nagapasalamat kami tungod sa mga gasa sa Lawas ug Dugo sa imong Anak, nga gidawat namo diha sa Sakramento sa Eukaristiya. Nagahangyo kami kanimo nga tabangan mo kami nga gutumon sa tuman sa iyang presensya, dawaton siya sa mata'g adlaw sa among kinabuhi, ug mapagahum kami niya sa pagmugna ug katilingbang nagsukad sa iyang pulong, presensyang Eukaristiko ug dalan sa Krus. Kini among gipangayo pinaagi ni Kristo atong Ginoo.

*T: Amen.*

---

## **Liturhiya sa Eukaristiya**

### **Paghalad sa mga Gasa**

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.'

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

---

### **Pag-ampo sa Paghalad**

P: Ihatag sa imong Simbahan, naga-ampo kami, O Ginoo, ang mga gasa sa panaghiusa ug kalinaw, kansang mga timailhan makit-an diha sa misteryo sa mga gihalad namo karon. Pinaagi ni Kristo among Ginoo.

*K: Amen.*

---

### **Pag-ampo sa Eukaristiya**

#### **Prepasyo**

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay siya ang tinuod ug walay kinutubang Pari, kinsa nagtukod niining sumbanan sa sakripisyong walay katapusan ug siya usab ang unang naghalad sa kaugalingon isip manluluwas nga biktima, nagmando kanato nga maghimo niining halad isip paghandom kaniya. Sa atong pagkaon sa iyang unod nga gihalad alang kanato, ug, sa atong pag-inom sa iyang Dugo nga gibubo alang kanato, kita nahugasan sa kalinis.

Ub busa, uban sa mga Anghel ug mga Arkanghel, sa mga Trono ug mga Dominaciones, ug uban sa mga kasundalohan ug mga Gamhanan sa kalangitan, kami naga-awit sa imno sa imong himaya, sa walay katapusan namong pag-ingon:

---

### **Santos**

K: Santos, Santos, Santos nga Ginoo, Dios sa kagahuman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.



---

## **Pag-ampo sa Eukaristiya**

(Human sa konsagrasyon, ang aklamasyon:)

P: Kini ang misteryo sa pagtoo.

*K: Sa among pagkaon niining Pan ug pag-inom niining Kalis, among gisangyaw ang imong Kamatayon, O Ginoo, hangtud sa imong pagbalik pag-usab.*

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

---

## **Rito sa Pagpangalawat**

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubus.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

*K: Kay imo man ang gingharian/ ug ang gahom ug ang himaya/ hangtod sa kahangturan.*

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

*K: Amen.*

P: Ang kalinaw sa Ginoo sa kanunay maanaa kaninyo.

*K: Maanaa usab kanimo.*

P: Ipakita ta ang atong panag-inigsoonay.

---

## **Kordero sa Dios**

*K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.*

---

## **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

*K: Ginoo, dili ako angay nga mokalawat kanimo, apan ipamulong lamang ug mamaayo ako.*

---

## **Pag-ampo Human sa Komunyon**

P: Mag-ampo kita: Itugot, O Ginoo, naga-ampo kami kanimo, nga magmalipayon unta kami sa walay katapusan diha sa among pag-ambit sa imong Diyosnong kinabuhi, nga daan nang gipakita niining panahona pinaagi sa among pagdawat sa imong mahal nga Lawas ug Dugo. Pinaagi ni Kristo among Ginoo.

*K: Amen.*

---

*(Mahimong mosunod dinhi ang prosisyon sa Balaanong Tinapay, nga walay panalangin sa pagtapos. Kon walay prosisyon, mahimong isunod kining Balaanong Panalangin.)*

## **Katapusang Panalangin:**

P: Ang Ginoo maanaa kaninyo.

*K: Maanaa usab kanimo.*

P: Moduko kita ug atong dawaton ang bendisyon sa Ginoo: Hinaut nga ang kalinaw sa Diyos, nga labaw pa sa tanang salabutan, magtipig sa inyong mga kasingkasing ug mga hunahuna sa kahibalo ug gugma sa Diyos, ug sa iyang Anak, ang atong Ginoong Jesukristo.

*K: Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

*K: Amen.*

---

## **Pagpanglakaw**

P: Panglakaw kamo ug isangyaw ang Nindot nga Balita sa atong Ginoo.

*K: Salamat sa Dios.*